

# Dad in gea profitescha il turissem grischun

■ (cc) La lescha chantunala davart las taxas turisticas (LTT) vegn discutada intensivamain avant la votaziun dals 25 da november 2012. Per prestar ina contribuziun a favur da la furmaziun d'opiniun e pervia da la gronda impurtanza dal project da votaziun prenda la regenza grischuna anc ina giada curt posiziun en chaussa. Las votantas ed ils votants dal Grischun decidan ils 25 da november 2012 davart in pass da refurma impurtant dal turissem grischun. Cun la lescha davart las taxas turisticas (LTT) vegn stgaffida la basa finanziala per in turissem grischun pli cumpetitiv. La lescha vul integrar solidaricamain en la finanziaziun tut quellas e quels che profiteschan dal turissem. Ella remplazza 120 relaschs communalas e sustegna las structuradas turisticas intercommunalas ch'èn vegnidas installadas ils ultims onns.

La regenza è da l'avis ch'in gea a la LTT saja decisiv per ch'il nov posiziunament dal turissem grischun haja success er vinavant. La finanziaziun che vegn reglada en moda unitara rinforza las regiuns turisticas en il chantun a lunga vista e las permetta d'agir autonomamain grazia a meds finanzials garantids. Da bleras varts vegn discutada la dumonda tgi che presta da nov ina contribuziun tenor la lescha. Ina pitschna explicaziun la tiers suonda.

La LTT na chaschuna nagina nova taglia generala per la populaziun dal Grischun. La lescha prevesa ina taxa ch'è graduada en moda gista per interpresas d'alloschament, per proprietarias e proprietaris d'abitaziuns da vacanzas sco er per mastergnantas e mastergnants che profiteschan differentamain dal turissem tut tenor la regiun e tut tenor la branscha. Lur contribuziuns restan en las regiuns turisticas e sustegnan là las infrastrukturas sco er l'installaziun e la vendita da purschidas turisticas (marketing). Davart l'autezza da la taxa decidan las vischnancas sezzas – en coordinaziun



**Betg obligadas da pajar taxas èn simplas chamonas d'acla e chamonas da chatscha.**

FOTO A. MATHIS

cun la strategia turistica da lur regiun e destinaziun.

## Uniuns da sport

Betg obligadas da pajar taxas èn uniuns sco uniuns da sport, uniuns da musica e.u.v. Pertutgads da la LTT èn ultra d'alloschadras, d'alloschaders, da proprietarias e da proprietaris d'abitaziuns da vacanzas interpresas, sco interpresas da commerzi, da mastergn, d'industria e da servetsch. Quellas han finamiras economicas. Las uniuns servan ad intents ideals e n'èn betg talas interpresas. Ellas n'èn pia betg pertutgadas da la LTT. Ultra da quai na profiteschan uniuns betg dal turissem. In profit han mo quellas e quels che cuntanschan avantatgs economic grazia al turissem. Quai manca dal tutfatg tar las uniuns.

## Aclas e chamonas da chatscha

Betg obligadas da pajar taxas èn simplas chamonas d'acla e chamonas da chatscha. La noziun «simpl» serva a far il cunfin tranter quellas e las chasas da vacanzas. La regla è pia: chasas da vacanzas èn suttamessas a la taxa, aclas dentant betg. Cuntrari a chasas da vacanzas na cuntanschan aclas betg in profit cun il turissem – ellas na profiteschan strusch da l'infrastructura turistica e da servetschs turistics. Il criteri n'è betg l'avertura, mabain il profit. Aclas che vegnan dadas en locaziun a giasts cunter in pajament conform al martgà han in profit ed èn perquai suttamessas a la taxa.

## Ospitals, spitex sco er chasas da persunas attempadas e da tgira

Tenor la lescha chantunala da taglia èn

ils ospitals, la spitex sco er las chasas da persunas attempadas e da tgira liberads da las taglias generalas. Tgi ch'è liberà da las taglias generalas è er liberà da la taxa turistica. Ina instituziun ch'è liberada da la taglia stuess mo pajar ina taxa sch'ella entrass en in sectur sco interpresa sin il martgà en concorrenza cun purschiders privats e sche quest sectur predominass. Quai n'è betg il cas tar ils ospitals publics, ma bain per exempel tar la Banca Chantunala Grischuna.

La regenza grischuna è persuadida che la refurma dal turissem grischun currenna po vegnir cuntinuada cun success cun in gea al project da votaziun chantunala dals 25 da november 2012. La LTT presta ina contribuziun impurtanta per l'economia publica futura da l'entir chantun muntagnard.